




921



歐陽文忠公文集

三五





Centimetres  
**TIFFEN** Color Control Patches © The Tiffen Company, 2007

Blue Cyan Green Yellow Red Magenta White 3/Color Black

Inches 1 2 3 4 5 6 7 8  
1 2 3 4 5 6 7 8 9 10 11 12 13 14 15 16 17 18 19









書簡卷第七

歐陽文忠公集一百五十

與謝舍人

絳字希深 寶元元年

某頓首再拜兵部學士三丈久以多故少便不果拜  
狀春暄尊候萬福省勝至獨遺聖俞豈勝嗟惋任適  
呂澄可過人邪堪怪聖俞失此虛名雖不害為才士  
柰何平昔並游之間有以處下者今反得之覩此何  
由不痛恨欲作一書與胥親及李舍人末學士論理  
之又恐自有失誤不欲輕發不爾可故見遺可駭可  
駭由是而較科場果得士乎登進士第者果可貴乎  
日日與師會相對驚歎不已伏承殿試考校今必已



了某替人猶未至拜見未間伏惟保重因人謹附狀  
不宣

又寶元二年

某頓首百拜知府舍人三丈三兩日毒暑尤甚不審  
尊候何似某昨走鈴下久溷賓館旱暑交作晏陰方  
興當君子定心靜事休息之時暑夕屢煩長者其如  
乘餘閑奉罇俎泛覽水竹登臨高明歡然之適無異  
京洛之舊其小別者聖俞差老而脩為窮人主人腰  
雖金魚而鬢亦白矣其清興則皆未減也臨別之際  
感戀何勝西禪竹林又辱餞送自夜出南城凡再宿

始至弊邑私門老幼徃徃病暑正如所慮此所以眷  
眷門下而不佞久留著也自鄧至汝陰道出田間由  
鉅欣橋而西秋稼甚盛時雨已足問之乃覽秀所望  
而脚正在陋邦然鄧州界二莫及也豈騎立之  
神一作憎家雞而愛野雉乎自還縣便苦一作俗事  
書記未能詳悉謹拜此叙謝伏惟幸察不宣從表姪  
歐陽脩頓首百拜

與王待制質字子野慶曆三年

某頓首拜運使學士子野兄春暄伏惟尊候萬福  
自去年閏月來東郡以就祿養幸如所欲惟僻陋日



益愚鄙爾在都下時子野兄舟行不克攀別其後送者還頗知留客甚歡而飲酒差多親族皆以素羸奉憂不知其後復飲否子野善自攝猶能絕葷血甘淡薄況於酒邪一別頓爾南北關於候問惟冀自重以慰區區不宣某頓首

與李賢良

觀字泰伯

嘉祐初

某啓冗事牽迫久疎奉長者之論不知兩辱過門甚媿甚媿某來日有少事須出即今幸家居可以拂席奉俟軒蓋顯企顯企不然當別拜聞貴不失約也某頓首賢良先生

與曾舍人

鞏字子固

慶曆六年

某啓雖久不相見而屢辱書及示新文甚慰瞻企今歲科場偶滯遐舉畜德養志愈期遠到此鄙劣之望也某此幸自如山州少朋友之遊日逾昏塞加之老退於舊學已爲廢失而韓子所謂終於小人之歸乎因風不惜遠垂見教未良會間自重自重

又

治平四年夏

某啓奉別忽忽暑候已深不審動履何似某昨假道于穎者本以歸休之計初未有涯故須躬往及至則弊廬地勢喧靜得中仍不至狹隘但易故而新稍增



廣之可以自足矣以是功可速就暮年掛冠之約必  
不愆期也甚幸甚幸昨在穎無所營爲所以少留者  
蓋避五月上官未能免俗爾亮之佳處人所素稱者  
往往過實其餘不及陳穎遠甚然俯仰年歲間如傳  
郵爾初亦不以爲佳蓋自便其近穎爾至此便值酷  
暑未能多作書相知或有見問者幸略道此意惟慎  
夏自愛

與蘇編禮

洵字明允

嘉祐二年

某啓自足下西歸承有家問忽遽而行時一小子卧  
病方憂悶中不得相見中間得還蜀後所惠書及今

者賢卽人至得書承尊履休康併以爲慰足下文行  
見推於時豈久窮居於遠方者未相會間千萬自愛

又治平間

某啓承示表本甚佳前所借謚法三卷值公私多事  
近方徧得披閱文字更不待愚陋稱述第新法增損  
今別爲一書則無不可矣成一家之言吾儕喜若已  
出爾謚錄卷秩旣多祇欲借某本

又治平三年

某啓多日不奉見承遷居不易初聞風氣不和謂小  
小爾昨日賢卽學士見過始知尚未康平旦夕來體



中何似更冀調慎藥食無由馳候專奉此

又治平三年

某啓自以拙疾數日闕於致問不審體中何如必遂平愈孫兆藥多涼方難用於今更且參以他醫為善也專此不宣

又同前

某啓數日來尊候必更痊安單藥得效應且專服千萬精審無求速功不欲頻去咨問恐煩勸也亦不煩答簡或賢即批數字可矣

與費縣蘇殿丞皇祐年

某啓特承書問兼惠篆碑滁陽山泉誠為勝絕而率然之作文鄙意近乃煩雋筆以傳于遠既喜斯亭之不朽又愧陋文莫掩感仰之抱寧復宣陳專人還謹此叙謝 舊用龍尾硯一枚鳳茶一斤聊表意

又

某啓前者辱見顧屬苦多事不得少伸欵曲比奉詞則承已歸縣矣但深快悒悒也辱惠書竊審經春體氣清裕某衰病疲憊日自彊勉未知報効不敢言勞尺阻閱惟多愛

與澠池徐宰 無黨 皇祐五年



某啓久不得書自聞省試日望一信人至忽得所示  
大慰鄙懷兼喜春寒所履無恙程試賦詩極工矣策  
贍博而辯論偉然皆當在高等人力所可爲者止於  
如此耳其他有命然俗言運亨者臨事不惑揮翰之  
際能至此其亦奮發於茲時乎計此書至已在高第  
故不予細不次脩書白

又至和元年

某啓真陽相別忽以及茲日月不居大祥奄及攀號  
擗踊五內分崩不孝罪逆蒼天莫訴哀苦哀苦久不  
得書日與無逸弟相望忽捧來示承在道曾感疾喜

今復常又知淮水淺濶雖深欲相見但恐阻滯遂失  
赴官之期若於事有妨則不若且就汴流西上如淮  
水可行與汴不爭遠近即茲來爲善賢弟在此寂寞  
中相伴大幸某秋涼方十離此南北未知何適五代  
史昨見曾子固議今却重頭改換未有了期仍作注  
有難傳之處蓋傳本固未可不傳本則下注尤難此  
頃相見可論改服哀苦中忙迫偶奉接人行聊此

又至和二年

某啓專人至辱書承官下無恙深慰示及誌文甚佳  
無逸弟又有煩惱可哀適值有人在此誌文當附去



又知且摧河南澠池本邑自可讀書爲政何必求來  
府中所云冬末當至京師暫來甚善一作無欲弟居  
監中時相見焦秀才亦在太學補監生恐知某碌碌  
于此士大夫有所論當悉以見告庶助其不及實有  
望也未相見多愛

又目前

某啓人至辱書承官下無恙深慰深慰所云進取之  
道能具達其如此夫復何患論及富公言范文正公  
神道碑事當時在穎已共詳定如此爲允述呂公事  
於范公見德量包宇宙忠義先國家於呂公事各紀

實則萬世取信非如兩仇相訟各過其實使後世不  
信以爲偏辭也大抵某之碑無情之語平富之誌嫉  
惡之心勝後世得此二文雖不同以此推之亦不足  
怪也其官序非差但略爾其後已自解云居官之次  
第不書則後人不於此求官次也幸爲一一白富公  
如必要換則請他別命人作爾

又嘉祐元年

某啓縣人來得書承寒凝公外體氣無恙深慰深慰  
所寄近著尤佳論議正宜如此然著撰苟多他日更  
自精擇少去其繁則峻潔矣然不必勉強勉強簡節



之則不流暢須待自然之至其如常宜在心也代天  
論既各有篇目不必謂之代天可也某近權省得罷  
稍閑已有削乞洪井若果得則私便尤多況非要任  
求之必可得也無欲弟在太學見兒子云甚安某一  
向多事少暇他亦疎及門恐知銓中新制破考之事  
稍緩若在本州無妨亦可已新年多愛

又嘉祐二年

某答人至辱書承涖官進學無恙甚以為慰所寄文  
字大佳然作文之體初欲奔馳久當收節使簡重嚴  
正或時肆放以自舒勿為一體則盡善矣某此待罪

誠碌碌然期必有為而自効士大夫見責者深是待  
我厚而愛之過爾敢不佩服冬寒自愛在致齋處草  
草

與焦殿丞千之 皇祐五年

某啓自相別無日不奉思急足辱書深所浣慰然聞  
不遂解名在於俗情豈不快快若足下素所自待與  
某所以奉待者豈在一得失之間但以科場文字不  
得專意經術而某亦有人事今足下三數年間且可  
棄去科場文字而僕亦端居無一事惟於此時可以  
講訓素所聞未舉者過此恐彼此難得工夫也足下



爲人明果以此思之亮可決然此首深恨閑居無人  
既不能專遣人去奉招當正初南歸亦不爲久別計  
但仰首傾望也某於哀苦中奉思諸君子此又不可  
言已寒多愛

又至和二年

陰雨況甚不欲頻奉邀蓋知請假甚艱也某恐不久  
出疆欲且奉託與照管三數小子某來日遂移過高  
橋宅中俟稍定疊便去般出學恐先要知仍請具此  
白胡先生知爲妙至時恐要人般挈請示及待令去  
晚間可出即見過閑話某再拜

又嘉祐元年

某啓知昨日已差試官庶事便當率稍涼體中佳  
否近晚或能見過閑話少時恐遂難得暇也麤細米  
各二斛聊飼僮僕輩必不以輕鮮爲怪有無相通亦  
鄰里之常事慙仄慙仄

又同前

某啓以數日齋祠今早方歸知曾來取藥體中佳否  
見解榜張燾秀才已獲薦不知肯且來此過冬否  
恐他要冬課嫌小兒喧聒不然蒙益則多矣某今日  
在家隨早晚見過閑話少時



又嘉祐元年

某啓今日見解榜尚疑脫漏姓名然初以得失委命而進則臨事自應不動于懷此孟子之勇也適歸家偶早幸略見過閑話某頓首

又同前

某啓數日大熱不審意思如何適令發至羣牧司去已却歸西岡不審何謂此中西位頗寬涼多南風甚可居至於飲食亦可取性固無形迹矣兼時得閑話請更思之勿以為疑也謹此咨啓後報某啓

又同前

某啓見兒子言尊候道和豈非患腹臙邪秋後慎生冷為佳以數日不相見甚思渴某一出參假便有人事區區加以兩日復熱恐彼中窄狹無事且來書院取涼無形迹也前時奉白嚮有策題彼中收得者幸為錄示或秋檢得本子此中亦有人寫蓋人事易因循也

又嘉祐元年

某數日不承問不審體中如何當漸平和但怪不見過故此奉問凡疾病不欲滯鬱頗須消息有以散釋其效多於服藥若能出入幸相過要人馬來取至於



藥物亦當商榷乃盡其理謹此咨啓某再拜

又同前

某啓稍寒想益佳裕數日人事忙迫非常前夕至學舍中見狼籍可憎所以未敢便請他張秀才更俟一二日大太祝歸略令灑掃兼庶事有所備緣某多故不能躬視也兩日欲去報此意亦無暇作簡衮衮度日公私不濟一事此京師之態也某奉白

又嘉祐二年

某啓昨日以客多飢疲風眩發作卧不能起承示簡不及時答所言張先輩但怪其登第後絕不相過餘

非所聞也亦欲旦夕召渠相見但以多事忽忽未暇爾今日知聞喜宴來日約其見過也

又嘉祐六年

某啓有無相通蓋爲常理更不存形迹也船不必白省主自遣人問當亦可得蘇氏昆仲連名並中自前未有盛事盛事姚闢詩說請試看有長處簽出示及爲無工夫細看故也

又嘉祐六年

承惠胡公銘茲人美德固樂爲之紀述第以文字傳遠須少儲思蓋尋常意思未及爲人強作多不佳也



自來日已往併無假故直至旬休如所諭行期甚迫當且前之續可附致潤州諒不爲晚也人還謹此白知小兒不安且慎調護大熱難將息也

又同前

某啓自相別後方欲作書遽承不疑學士有來歸之命自後更欲附書則思舟行必已在道無處可附亦以不久相見不必爲書也適得信喜來甚速且承酷熱中體氣清安其他皆可盡於相見也某爲今夏病暑不可勝任又得喘疾遂且在告蓋衰老之態自然如此也略留來人附此草草

又嘉祐六年

某啓自相別更不聞問近得邵學士書云已到家方喜知動靜兼承所履安和實以爲慰某病衰如昨不惟任責愈難常至於勞苦亦筋骸不能支等爲可責惟早自知止猶勝彊顏以貪寵利自計非不熟但恐未得如志遂爲君子之棄而小人之歸爾南方宜多有聞見不惜垂論猶勝不知也有望有望前者胡公墓表誤書陵州人當問其家爲改正歲晚寒凜以時自愛因人惠問

又嘉祐末



遽爾大熱病軀殊不可當數日不相見體中佳否知  
已授樂清果如何來日見過家殮幸早枉步乘午前  
稍涼庶幾可坐也無它客姚秘校劉真蹟至此止

又治平年

某啓范氏子書來并獲所寄書自承赴樂清後方拜  
此一書審此居官下安和稍釋傾想陋巷之士得以  
自高於王侯者以道自貴也一從吏事便為禮法所  
繩若居人下而欲有設施則世事難如人意更當屈  
伸取捨要於濟務此非獨小官自古聖賢尚以為難  
所以前世一節之士以貧賤為易守也自臨縣治今

將及暮諒深諳此態也某嘗再為縣令然遂得周達  
民事兼知宦情未必不為益某愈覺衰殘齒牙搖動  
飲食艱難食物十常忌八九情懷益蕭索物外浮榮  
信乎不為吾儕得失也有名即去矣未相見間公餘  
慎愛因人時惠問不宣某書白

與王主簿回字深甫

某啓嚮者深甫在京師則以俗冗不常得相見既去  
又不時為信問視其外豈非踈且慢哉然求諸中則  
不然也人至惠問承奉太夫人萬福下情瞻慰某棄  
病日增殊無世間意趣近買田穎上思幅巾與二三



君往來田間聞其樂尚可終此餘年爾而其勢未能  
速去非為之不果猶須晚獲也深甫以謂如何賢弟  
昨西略見爾祁寒更乞自愛

又

某啓累日以聖節諸事區區未得祇候大熱不審體  
氣如何來日見過家殮庶得接清論少時幸早垂訪  
也專此咨啓不宣某再拜深甫先輩 常君未及作  
書續得馳問因見為伸意千萬千萬

又

某啓人至辱示借書並領昨日少奉清論開沃無限

嗽良減否師魯文略讀一二篇令人感涕碑文集錄  
皆納去某又上

與姚編禮聞字子張 皇祐五年

某頓首閑居絕無人使又不欲頻煩郡中借人所以  
久不作書上杜公然哀苦中無限瞻依也因請見為  
多道哀懇希文得美謚雖無墓誌亦可況是富公作  
必不泯昧脩亦續後為他作神道碑中懷亦自有千  
萬端事待屢舒寫極不憚作也只是劣性剛編平生  
喫人一句言語不得居喪犯禮名教所重况更有纖  
毫譬如閑事亦常不欲人擬議况此乎然而不失為



他紀述只是遲着十五箇月爾此文出來任他好邪  
謗議近我不得也要得坦然自立徹頭湏步步作把  
道理事任人道過當方得恰好杜公愛賢樂善急欲  
范公事迹彰著耳因侍坐亦略道其所以但言所以  
遲作者本要言語無屈準備仇家爭理爾如此須先  
自執道理也餘事不必云云背碑子極奉煩多荷多  
荷因見杜贊善託問實錄不必封但只恁寄來此中  
程判官亦為伸謝將書來後信有書去某再拜

又  
某啓專人辱書承守道為學自如甚善見諭紹嚴事

止於如此則又何言君子之言必誠誠久必見凡有  
諸中未有不形于外者惟當以久見吾子之誠爾禮  
記雜亂之書能如此指植其繆其功施後世無窮非  
止効俗儒著述求一時之名也然其中好語合於聖  
人者多但當去其泰甚者爾更宜慎重如坊記一篇  
難破請更思之然遇所見且論次不惜錄示

與王幾道

復

景祐九年

某頓首白幾道先輩足下段氏家人至蒙示書及詩  
并子聰聖俞書與詩後於東山處又見詩何其勤而  
周也聖俞得詩大喜自謂黨助漸熾又得一豪者然



微有饑態幾道未嘗爲此詩落意便爾清遠自古善吟者益精益窮何不戒也呵呵問別後事自彥國去後患一腫疽二十餘日不能步履甚苦之時惟聖俞一來相問臨清之歡何可得邪師魯已有召不宜更俟嫁女幾道與彥國宜督以來走明日就試恐要知之惠詩未暇答以此也

答孔嗣宗字伯紹河南人 皇祐元年

某啓辱書甚善尹君誌文前所辨釋詳矣某於師魯豈有所惜而待門生親友勤勤然以書之邪幸無他疑也餘俟他時相見可道不欲匆匆於筆墨加察加

察某再拜

又同前

東方學生皆自石守道誘倡此人專以教學爲已任於東諸生有大功與師魯同時人也亦負謗而死若言師魯倡道則當舉天下言之石遂見掩於義可乎若分限方域而言之則不苟故此事難言之也察之

與尹材慶曆八年

墓銘刻石時首尾更不要留官銜題目及撰人書人刻字人等姓名祇依此寫晉以前碑皆不著撰人姓名此古人有深意況久遠自知篆蓋祇著尹師魯墓



四字

與蔡文 皇祐五年

某啓人至辱書感尉何已且承春序履況清休范公  
襄事脩以孤苦哀困中杜門郊外殊不知端息情禮  
都闕但得淮西寄到誌銘豈任感涕文正平生忠義  
道德之光見於誌謚為信萬世亦足慰也神刻謹如  
所諭敢不盡心某忝以拙訥獲銘當世仁賢多矣如  
此文復何所讓但以禮制為重亦不遲年歲中貴萬  
全無他議也悉察悉察迷夢後序更當勘尋史傳續  
報然亦當慎文正所慮至深某亦疑其有意不用此

篇果如所料矣試期不遠佇奉賀加愛加愛某再拜

答曾舍人

鞏字子固

熙寧四年

曾

某自歸里舍以杜門罕接人事少便奉書中間嘗見  
運鹽王郎中得問動靜兼承傳誨近又聞曾少遠和  
急足至辱書喜遂已康裕甚慰甚慰某秋冬來日足  
粗可勉強第渴淋亦少減老年衰病常理不足怪也  
餘在別紙某白見諭乞願具止亦佳此時尤宜安  
靜為得理也惠碑文皆佳多荷常筆百枚表信  
不罪不罪

又同前



辱示為人後議筆力雄贍固不待稱贊而引經據古  
明白詳盡雖使聾盲者得之可以釋然矣父子三綱  
人道之大學者久廢而不講縉紳士大夫安於習見  
閭閻俚巷過房養子乞丐異姓之類遂欲諱其父母  
方羣口誼譁之際雖有正論人不暇聽非著之文章  
以要於久遠謂難以口舌一日爭也斯文所期者遠  
而所補者大固不當以示常人皆如來論也某亦有  
一二論述未能若斯文之曲盡然亦非有識之士未  
嘗出也閑居乏人寫錄源相見可揚推而論也自去  
年至蔡遂絕不作詩中間惟有答韓郡二公應用之

作不足采惟續思穎十餘篇是青州以前者并傳記  
皆石本今納上自歸穎它文字亦絕筆不作恐知恐  
知 青州十餘篇亂道為說道上石彼近必見矣

書簡卷第七

四王待制

子野兄舟行

一作承舟行

攀別

一作攀送

自攝

此下有

字治

與侯殿丞第十一帖

不必白

作白頂

與姚編禮第一帖

不惜錄示

此下一

去留之

耳為

來人

督商識

書不容少頃當續有  
具白也




與孔嗣宗第一帖

尹君一作然以一作後切切一作乃

若言

此上一字不可作



書簡卷第八

歐陽文忠公集一百五十一

與丁學士

實臣字元珍

皇祐四年

某啓自聞南方寇梗思欲附問凶禍閑居難求的便  
雖在哀殞翹想之心不可道也元珍學行優深才當  
遠用一作遘一作此不幸古人多然在處之有道爾古之  
君子所以異於常人者能安常人之所不能安也所  
恨某居此際不能奔走耳某衰病無復生理今秋欲  
扶護歸鄉恐趨葬期不及則旦權厝鄉寺俟它年耳  
忽偶黃莘先輩過云賢兄在舒州因得附此草草不  
能盡鄙懷當續馳訊也秋熱寬中自愛某再拜



又嘉祐四年

元珍淹屈于外交游所宜出力既默無所為而至於書問亦不能時致其勤其為慚罪不待言矣某自蒙恩歸院雖稍清閑而忽忽度日公私無所益此處京師者汨汨之常態也幸非甚愚頗知脫此而遠去然事有不得速去者古人所謂不如意十常八九者殆此類也今歲廷試得人之盛中外共慶況在佳婿此豈非久滯中一可喜事哉今因胡推官行謹奉狀相次陸君行當別布懇

又嘉祐四年

某向在府中困於煩冗久不奉狀徒用瞻思專人遽來特辱嘉問承涉夏已來體氣清福深所欣慰元珍才行並高而困蹇如此吾徒之責也某昨被煩使初不敢辭然几案之才素非所長加以早衰多病筋力不支屢自陳乞蒙恩得解去實出天幸然請外之志尚未獲素心又以殘史終篇有期夏秋之交可決南去相見未涯千萬鄙懷臨紙不能悉布惟慎重自愛以順休復

答郭刑部輔

某啓方欲因兒子行奉狀遞中忽辱書可量欣慰兼



審春寒動履清勝承諭以嵩少之游豈勝跋羨此樂常為山人處士得之衣冠仕宦比其汲汲得如其志不老則病矣雖有登臨之興勉彊而為之已不勝其勞也若神完氣銳惟意所適如公之樂者百無一二人也如某者目固不能遠望足亦不仕登高矣可歎可歎相見未涯嚮暖加愛

與朱職方

處約

嘉祐五年

某啓久不奉狀夏熱公外竊惟體履休勝陳說寺丞佳士也曾任滁州同官今其南歸願拜識幸希留念也屬唐史終篇忙迫作書不謹備恕之方暑慎愛

與蔡省副

某頓首公私忽忽久闕致誠辱教字承已登舟遂不復一得叙別可勝瞻戀短景日暮還家客已盈室寢食殆廢習以為常以此久不奉問慙罪慙罪汝陰君子久處疾少間當來歸未見惟寬中自愛審用藥餌不盡區區

與王發運

鼎字質臣

嘉祐二年

某啓中春膏辱惠問不審涉夏暑毒體氣如何某自出貢院為羣士誼詒尋而入夏京師早疫家人類染時氣區區中復有病患憂煎以此久不附狀寶臣治



漕南方雖久淹于外然振綱革弊公私所賴者不細  
比於碌碌于此無所云補者所得多矣某再請洪井  
未得屢罄所懷期於必得也未相見間惟為時自重  
謹於遞中奉此不宣某再拜

又嘉祐七年

某啓衰病無綜難久於此加以私計日思南去未可  
得者無他近時內外制請便例不得從爾柰何柰何  
自之翰有事故人零落所存者幾更復何心追後生  
於紛華某將入貢院時之翰疾已甚比出遂不見遽  
失斯人為恨何勝與同年相知尤甚遂及之愁人愁

人中間承惠金櫻煎近方開而服之其製一作煎尤精  
多荷中年衰病太甚世情已去但猶藉藥力且扶旦  
夕爾遽中不子細

與馬運判皇祐二年

某啓久別欣此瞻候陰寒道中尊候休勝河役動眾  
疲民利害繫公處置之耳他俟握手不能具述因人  
走此不宣某再拜運判裏行執事十二月七日

答韓欽聖宗考 嘉祐二年

某啓昨使舟行日不及攀別深以為恨人至辱書伏  
承署事以來當此祁寒體况清福實以為慰也外補



之樂得之有素伏讀佳作益以起予無用之質衰病  
颯然造物者畏浮議以見廢柰何柰何歲晚以時自  
重人還謹奉此為謝不宣某再拜欽聖提刑學士十  
一月二日 辱寵惠佳篇欽誦不已旦夕和得遞中  
附上新甘奇味珍荷也珍荷也部頭事藝稍進得賢  
者齒間更增勉勵也呵呵劉守到必還使司當復清  
淡也嘗說襄陽山水一經真賞果如鄙言否

答李學士

嘉祐八年

某啓自遭罹國郵哀摧殆無以生伏惟感慕攀號何  
以堪處伏承遠賜存慰豈勝感咽孤拙遭遇昔與安

道皆奉清光今茲衰晚才薄責重未知死所何以論  
報嚮秋更冀以時加愛

與王學士

某頓首京師區區自朝及夕無益於公私而思接賢  
者之論亦不時得近兩辱見顧皆不獲迎候豈勝為  
恨寒陰不審氣體何似旦夕當卜至門未間先此為  
謝冀有以亮之而已

又

熙寧三年 此帖又載  
第九卷却云 與薛少府

某啓急足至辱書喜承尊候萬福貴眷各安甚慰企  
想近入京衙校過穎捧手教尋於遞中奉狀必達視



聽某到此以弊止未完因少留以葺然欲遂為掛冠  
之請遠近相知皆相督以蔡是白乞頃且勉赴到任  
徐請歸休未遲今遂治行二十一二間上道三四日  
至際別拜狀恐久滯急足忙中作書不悉

答張學士

嘉祐二年

某啓中間辱惠書未違脩答又辱惠書意愛勤勤重  
增感愧某以嘗患兩手中指攣搗為醫者俾服四生  
丸手指雖不搗而藥毒為孽攻注頤頤間結核咽喉  
腫塞盛暑中殆不聊生近方銷釋衰朽百病交攻難  
堪久處茲地漸欲謀為退縮得免罪戾以疾為名而

去猶是幸人使騎巡歷何時一過都下少遂握手未  
間以時自愛仲儀喪子應滯行期許事猶煩餘暇冲  
鄉恐猶未歸未及作書為懇

又

嘉祐二年

某啓區區久不馳問豈勝瞻勤暑毒竊惟體履清福  
兼承權留務都邑孔道諒少勞神中間嘗辱惠問不  
時修報亦可知其冗率也慚感慚感某唐史終篇遂  
當復尋江西之請衰病無堪為歸老之謀爾未由握  
手莫罄鄙懷惟冀為時自愛以副企詠

又



某啓前日專詣舟次值不在略見賢郎比欲旦夕再  
祇候而大雨連綿無由出門兼恐已行忽辱手教乃  
知即今方行不獲面別惟以時自愛瞻企何已東南  
應亦有所欲但倉卒不暇續當有信咨煩也將同年  
千萬為伸意近得書亦當作書也南郡近有書去矣  
人立待草草

又

某啓衰病無堪叨竊過分方深愧懼遽辱誨存兼承  
惠寄佳篇豈勝珍誦湖園野趣近郡所無夢寐在焉  
何嘗忘也若得偶逃罪責歸老其間遂養慵拙何勝

幸也歲晚寒凜款言未期惟冀以時自重

答陸學士

經字子履

至和二年

某啓使北往返六千里早衰多病不勝其勞使者輩  
徃凡七八獨疲劣者尤覺其苦也還家人事日益區  
區浮生何處得少休息承子履在洛甚安又知來鄭  
書碑咫尺莫得奉見獨見勝之備知動止辱書益用  
為慰漸暄珍愛人還謹此

又

熙寧四年

某啓久闕奉問忽枉以書奚勝感慰兼審經寒履况  
沖裕某衰病餘生得請歸老而還官兼職皆出特恩



榮幸之愧無以為諭第久疾累年頓難減損然得此  
開適足以安養又其幸也遂復田畝無期會見企仰  
而已千萬加愛

又治平四年

某啓早來辱枉使車重增媿感過午遂熱承勳履清  
和方苦昏之忽被手教兼惠以藥并方尤荷意愛之  
厚第藥性差熱當漸漸服之也竊承代歸有期依依  
之意愚當與穎民同也餘留面布人還少奉此

與刁學士約

某啓前日承寵訪秋暑計尊候康和以居處狹陋欲

卜定力約數君奉同閑話一日既稍寬涼又佳水烹  
一兩盃茶幸告月初約一日恐為會處多故先次作  
此咨啓

答連職方

唐字君錫

天聖中

某惶悚頓首上黨三哥良執少一作久別伏想體中佳  
好近者兄長行獲奉短札懇悃之素具之如昨洎任  
進來得三兄信伏知軒車猶未歸仙墅某自返黨間  
邈然塊處日以賤事相逼魚鱗左右至於筆硯之具  
視同長物而已前承寵示佳句久欲為答柰六情底  
滯不能叩課加之對雷門之前非布鼓之能過也但



劾曹生游揚李布之名日得傳播於漢東士流之間  
諷誦傳寫者迨國使中山兔悲而洛陽紙貴也今勉  
成一首以報來賜小生學非師授性且冥忝仰賴良  
交時賜教誘若不為索其病疵而姑劾司馬生言好  
字則三哥顧我之厚薄可由斯而見矣崢嶸且晏平  
居寡徒想望故人能不愴恨時因北風幸無忘德音  
之惠某頓首

又嘉祐五年

某啓近嘗辱惠問不審寒來體履如何京師區區幸  
時與元禮相見然衰病鮮悰無復壯年游從之樂也

殘史已終篇南歸之思如欲飛爾君錫決然遂獲閑  
居之適應知此趣真老者之所便也況竊祿甚厚於  
國無補豈堪碌碌久此乎握手未期聊為君錫道此  
盛寒多愛

又熙寧

某啓令姪過郡辱書粗尉積年思企之勤兼得一詞  
起居康福外絕世欲內養天真宜其極方外之樂享  
眉壽於無涯某寵祿盈溢心志衰零尚此盤桓未償  
夙願然亦不出新春歸計可決第思場屋之游四十  
年之舊零落之餘所存者幾而吾二人者邈焉各在



一方未知握手之期用此不勝區區爾歲律適盡寒  
色嚮深惟以時加愛

又熙寧四年二月

某啓守祭忽已半歲老年百病交攻賴此閑僻偷安  
然猶經春在告人事曠廢咫尺相去闕於馳問使至  
辱書旣慚且感喜承尊候康裕某以衰殘未遂一女  
之願勉彊憂畏惟思高賢速識早能超出塵累宜享  
福壽於無涯也企慕企慕相見未期初暄保愛

又熙寧四年四月

某啓相去不遠惠然之顧出於乘興古賢佳事有望

於故人但不敢坐邀爾某入新年陟更衰殘昨三月  
中欲遂伸前請決計歸休封遞角次得闕報陟兵為  
尊遠近驚懼朝廷方有西顧之憂遂且少止今已寧  
息非晚必期得請也若遂還穎則相去益遠至時或  
一就蔡枉顧可否千里命駕近世未聞亦是一時奇  
事有望有望亂道恩穎詩一卷粗以見志閑中可資  
一噓

答連郎中 序字元禮

某啓才薄力劣任非其稱初無報効徒自為勞人事  
都廢恃親舊見哀而不責小故湖外風土如何嚮承



體中亦小不佳今喜清康君錫兄亦久不承問多事  
忽忽不曾作得一書慙悚慙悚惠柑甚佳遠地難致  
尤為珍感鳳團數餅聊表信而已歲律遽窮新春多  
愛

又

某啓承賢郎小娘子見過故人有佳兒女朋友所當  
共慶也兼辱簡字惠以熊白并躡鮓等皆飲酒具獨  
患累日苦目昏未能近盃杓也朝暮乘閑道話

答丘寺丞

某頓首今日食後就寢方覺擁被卧讀太白集忍辱

惠佳篇豈勝感愧當亦牽強為報恐滯使人且此為

謝

答韓宗彥

嘉祐四年  
欽聖二幅即  
本卷前有答韓  
宗彥也誤真此

某啓專人辱書承此初暑體履清勝實慰瞻勤前在  
府中嘗辱惠問牽以俗冗不時布款昨以衰病屢自  
乞蒙恩俾解煩劇雖江西前請未獲素心而疲憊計  
不能久粗得休息亦不勝其幸方得復從諸公之遊  
而子華遽遷執憲然命出中外稱愜某既得閑適遂  
且盤桓過夏秋冬當遂前請相見未涯但聞風采行  
被嚴召未間暑熱以時自愛因人還謹此為謝



答黎宗孟

醇

熙寧二年

某啓近遣家兵至萬壽奉迎有書計達專人惠教乃承路中得疾問來人不能詳言即日必惟已獲痊安旅中有疾亮難久也辱諭尋醫細思皆小小外事不足動懷豈宜輕爲去就許昌避醫介至毫又陳曹爲梗今又復然足驗世人常態處處如此然則尋醫所至未必見容但當寬度包之爾富丞相奉知必不淺已教他舉留再任莫且隱忍終之否某性自少容老年磨難多漸能忍事前後蒙見教者豈非欲某寬中以忍事耶却敢以此意奉規不恠不恠未敢奉邀必

且徑還家也嚮暖加愛不宜某再拜

與裴如晦

嘉祐五年

某啓酷暑阻奉見竊惟體氣佳和新事頗動人耳目惟靜處聽漏益覺其喧也聖俞賻助遂獲幾何苟有所得幸且勿送其家也望略批示或約相見爲佳謹此咨啓某再拜如晦學士廿四日

答杜植

嘉祐五年

某啓公私多故久闕馳誠然亦久不承問忽於遽中辱書喜慰無量兼審經寒動履清勝不相見數年間親舊零落所有無幾在者衰殘老病於理宜然其間



不能量力決然早去而留連祿仕任過其分勉強碌碌迄無可稱以取責於一時而貽譏於後世則鄙人於數老叟中又獨負此若寵利紛華不惟非素心所溺就令心有所好大抵晚年實能享者於身所得幾何由是言之得失不較可知自去夏迨今病恙交攻尤苦齒牙飲食艱難則嚮所謂於身所得者無復有爾可嘆可嘆不相見米因書及此聊當一笑爾聖俞家賴諸故人力得不失所璋州兒子輩更在教育他事應在雅懷有以處之不待言也新歲千萬加愛因風不惜惠問以慰瞻仰不宣某再拜

答陸伸

某啓人至辱示長書及古今雜文十軸其研窮六經之旨究切當世之務與其辨論文辭之際如決壅塞闢通衢以瀉浩渺之無窮御馭駿而馳騁然則吾子之所能與其所用心者不待相見而可知矣某衰病廢學多難於時常幸得空閑之處苟樂於自棄而吾子獨不棄之惠然見及何以當之欣慕感媿聊茲爲謝幸察其區區

與丁學士

見英辭類彙 已下續添

元珍屈處冗務士夫所歎清議尚存自當奮滯惟通



塞有時少須之耳某碌碌于此為庸人出處之計前以屢陳矣

又

冗務誠非賢者所處然屈伸之際又非賢者不能安也凡在交舊莫不以此為慮而未知所以為之奈何自古賢達之士固嘗有所屈伸其所以處之者乃其平生所學者耳足下所存遠大故知必能及此敢道之

與蔡省副

嘉祐

年

見名賢簡答

某啓昨日無以為禮深用慙醜宿來動履想佳然中

席遽起遂不可留變此新例他時東齋之會敢不遵用故事也適得冲卿簡言原父已送詩云某殊未有一句欲借一拭目以發衰鈍三日欲去出城送冲卿能往否此不敢強開及之

又

嘉祐

年

某啓昨日知與冲卿賞月必有餘樂某亦邀同輩三人淡坐不飲殊亦鮮歡但飲冷過多又病真不能追逐少年矣前時烏絲欄輒留欲書其後尚未有暇適因尋書別得少佳者且納上聊資揮灑章望之長言試為一閱

後日方得奉見謹此咨布



與裴學士

名煜字如晦理知潤州

嘉祐八年以秘閣校前有嘉祐五年一帖

某啓公私冗瑣人事多廢不獲奉問忽已逾時專人  
辱書承經寒氣體清安稍慰瞻想也某年齒日增心  
志日耗材薄任重憂責無涯故人在遠誰與教告誠  
未知稅駕之所也如晦代歸有期竊承私門多所憂  
撓顧知紛紛此世少無事人也惠甘誠為佳物然不  
飲已暮年矣茶湏膏方敢致謝嚮春和更希慎愛專  
人選謹奉此不宣某頓首如晦學士足下二月三日

與趙學士

名若若字元考

熙寧年

脩啓頃蒙軒騎少留忽忽殆踈款奉然每親餘論獲

益已多少別方爾傾馳辱書感愧且夕亮且就道霜  
月鷁寒千萬愛攝不宣歐陽脩奉啓太常學士執事  
八月晦日

承示集古跋尾數事頓發蒙滯恨不早拜呈也

書簡卷第八

與丁學士第一帖

不可道

一作不可道

不能安

一作難安歸

鄉此下一首以風波道遠五字



第二帖 况在佳壻此豈非久滯中一可喜事哉

一作况在佳壻  
高興良增喜慰

深所 乃一作心

中春 一作春中

以時 一作為時

疲憊計不能久 一作疲憊文不能自支

書簡卷第九

與薛少卿 公期

歐陽文忠公集一百五十二  
景祐三年

某頓首再啓東園一別自夏涉秋今倏冬矣汴汭絕  
淮泛大江凡五千里一百一十程纔至荆南見家兄  
言出京時有公期書渴得一見要知別後事然數日  
尋之不見遂已某自南行所幸老幼皆無病恙風波  
不甚惡凡舟行人所懼處皆坦然而過今至此嚮夷  
陵江水極善亦不越三四日可到又聞好水土出粳  
米大魚梨栗柑橘茶筍而縣民一二千戶絕無事罪  
人得此為至幸矣祇是沿路多故舊相識所至牽率



又少使人作書入京公期始約今冬赴絳州必非人行矣每憶君謨家會頗如夢中未知相見何時惟自愛而已因人便附書在君貺處乃可達今因遣白頭奴入京謹附狀不宣

又景祐四年

某頓首自公期東門之別忽已踰年南北之殊相去萬里音信踈絕於理固然昨至許州蒙訊問備審官下為況甚佳邇來諒惟自公之餘與閭內貴屬各保清休某居此為況皆如常親老幸甚安室中驟過僻陋便能同休戚甘淡薄此吾徒之所難亦鄙夫之幸

也多荷多荷公期遊宦故鄉其樂可量思昔月中琴奕樽酒之會何可得邪某久處窮僻習成枯淡頓無曩時情悰惟覺病態漸侵爾弊性懶於作書區區思慕之心非有怠也惟仁者察之讒謗未解相見何由惟慎疾加愛因人至京頻示三兩字為禱其如方寸莫能盡也不宣

又康定元年

某頓首再拜公期九哥足下比者伏審五丈人文母相繼傾亡聞訃交至不勝悼怛若事伏惟罹此酷毒摧痛哀慕奈何奈何孝子之志在於不滅更望節哀



就禮以全大孝是於親友為大願也自去秋質夫有  
事顯侯公期替歸不意遭此凶變知扶護且歸絳州  
朱審何時可至京邑一別數歲其走萬餘里艱險備  
嘗公期又有此患人生若此可嗟可嗟八哥在京尚  
未有差遣亦欲求一住京所貴照管君貺與某亦時  
時到宅內外如常不慮中前君貺行曾有書他為有  
起請不肯附去今同封呈前後累寫下書皆因循不  
附去得悚息悚息秋寒哭泣扶護千萬寬節以副區  
區謹奉此致慰

又慶曆三年

某頓首啓自公期到京便欲拜見初期見訪尋以某  
欲入都遷延至此近以定日必行一夕小兒輒病遂  
阻行計然猶幸僅存其生至今尚未安所賴有可醫  
理行既無涯虛滯軒車久阻歸計慚惕料某不徃公  
期便行也企渴企渴他具夫人書記累辱問小兒病  
無慘中未及奉書市藥甚煩挂意春暖各希保愛瞻  
祝瞻祝不宣

又皇祐二年

某啓到此已將百日牽率如初以此久不奉問遮中  
并人至兩辱書承寒來寢味多福霈恩進秩不敢為



賀彼此然也某此區區辛事漸少稍息肩奉告作鞍  
蓋為郡人晒其太陋爾相次專人附銀去式樣一依  
官品可也冗事乃煩長者惶恐惶恐餘具後信冬冷  
保重

又嘉祐年

某啓累日不相見承在軍器庫中必甚勞神暗和體  
氣喜佳裕玉冊官便當遣去有暇因出見過看漢碑  
今日私忌家居恐知

又嘉祐年

某啓昨日見姝子自宅中歸云公期猶患暑瘧不審

旦夕來尊候如何今日欲於軍器庫中奉問又恐不  
入為前日所見偷竊者驚家人欲於宅西添一鋪巡  
警不知有例否夫人言公期宅前曾初添一鋪不知  
申報何處施行略希批示因出閑過少話某再拜公  
期即中

又嘉祐年

某啓昨夕承過顧經宿熱未解甚可苦也體中安和  
數日有人將一馬來行亦快不見驚蹶不知毛骨如  
何云要百千為定價直否試令牽呈昨夕忘却閑說  
及幸告批示草解丸方專令咨請不罪不罪



又嘉祐治平間

某啓昨日作書未及發忽得來介所惠書頓釋月餘  
憂想之懷家人尤以爲慰也所喜涉暑到官尊幼各  
安寧仍知頗以郡事爲意如此日月亦易銷遣某嚮  
在夷陵乾德每以民事便爲銷日之樂苟能如此殊  
無謫官之意也某偶因用街市淋洗藥拔動風氣左  
脚疼痛數日在告不意傳報特煩軫念感愧感愧盛  
暑公外加愛家人亦自有書此不多述不宣

又嘉祐治平間

某啓近併捧三書具審至汝以來動靜甚慰企渴爾

比日竊惟公外體履清福貴眷各安和今夏京師大  
熱疾疫尚未衰息頗聞許洛特盛幸喜汝獨無之雖  
然郡事久不治下車之始不無勞心今必稍簡則漸  
可樂矣崔庠按已斷却報必見罪狀不若初聞之可  
駭然刑名亦重舉主多不免茲亦奈何淄州近不得  
書應是煩惱某今歲病暑飲冰水多目生黑花多在  
告舉家幼小幸安最後將書來人戒渠來取書輒私  
去故於遞中致此暑伏方盛慎愛不宣

又嘉祐治平間

某啓多事忽忽等閑不奉狀遂復逾月茲者楊氏子



來辱書承秋來公外動履清康貴眷各安粗以為慰  
郡事以太守養疾甚煩裁處然臨以餘刃莫不為勞  
苦加之歲事豐成盜訟當漸稀簡也某以私門過夏  
嚮秋幸且安帖秋是孤危之迹勢漸難安群口籍籍  
外亦應聞病目愈甚承惠藥方便當精意服之也連  
日從駕歸遂卧病兼亦筋力去不得也餘俟家人自  
有書殘暑更冀以時自愛以副瞻企

又

治平二年

某啓近以雨水為患舉家驚奔所幸人物苦無傷損  
寓居定力公私擾擾久不附問急足忽來惠書承秋

來公外體履清福貴眷上下康安稍以為慰報國無  
狀致此天災皆由時政多闕上貽聖憂方共引咎遠  
承見教丁寧切至蒙愛之厚愧感銘藏而已知汝極  
豐郡政修舉盜訟遂稀應多閑暇之樂也某忽忽無  
悰病目如在昏霧中作書甚艱餘不遑及嚮寒保重  
因風時枉問

又

同前

某啓新陽納慶伏承動履多福人至辱書感慰無量  
京師水後繼以陰雪甫近郊禮次開晴青城宿齋雲  
日澄和人情舒暢遂成大禮衰朽之質執事忘勞前



此公私事叢久闕致問自是而後應且休息一晴鎮  
過無限浮議天幸天幸餘非筆墨可罄人還僅布一  
二深寒多愛

又治平三年

某啓自承受勅後日與家人望軒騎來歸何久而絕  
不聞問春夏之交氣候不常不審體况何似想與貴  
眷各安某此內外如常但自春來病渴淋不止在告  
多日乞一近郡養疾已三削竊料旦夕當至都門故  
專走兵迎候其他湏面叙病中不悉

又熙寧元年

某啓近法曹廳人回特惠書經節竊惟公外氣體安  
和某到官忽已兩月幸與諸幼如常但老病益衰民  
間興利趨公事目百端昏然並不能省若常時公事  
則絕簡過客亦稀苟祿偷安負愧而已公期臨郡已  
多時莫湏別有差遣某以病苦難久尸居歸心有素  
何日遂如所願相見未涯窮冬感寒惟加攝為祝

又熙寧三年此帖入載  
第八卷却云與王學士

某啓急足至辱書喜承尊候萬福貴眷各安甚慰企  
想近入京衙校過穎捧手教尋於遞中奉狀必速視  
聽某到此以弊止未完固少留以葺然欲遂為桂冠



之請遠近相知皆相督以蔡是自乞湏且勉赴到任  
徐請歸休未遲今遂治行二十一二間上道三四日  
至蔡別拜狀恐久滯急足忙中作書不悉

又 熙寧四年

某啓專人辱書承秋暑體候康適貴眷安寧甚慰甚  
慰某茲者告老得請恩典殊優出於萬幸穎蔡至近  
雖冒大熱信宿便至遂為閑人庶事皆如素計惟當  
營舍久而僅了族大費廣生事未成倫理頗亦勞心  
然措置稍定不復更令入耳則是人間無事人爾知  
幸知幸承冬中當替歸可遂相見豈勝欣願但恐未

間別有美命也某此老幼幸如宜聞相去祇四程必  
時得書問往還殘暑公外多愛

又 同前

某啓迂吏過州辱書承經寒體況清裕貴眷各安甚  
慰勤企某與諸幼幸各如宜自還田舍已百餘日庶  
可稍成倫理粗免勞心始覺漸有閑中趣味然目足  
之疾初未少損蓋累年舊苦勢難頓減又迫於年齒  
愈老而益衰其如坐享厚俸飲食無為微倖之愧感  
激而已承美替有期冬末行舟淮潁當得一會面但  
恐未間別有美命就移不然豈勝欣望也深寒未相



見間多愛多愛

又 熙寧五年

某啓自使舟過郡閉門庶事乏力又值雪寒難於舉動加之病齒妨飲遂不成主禮退居屏迹惟交親難相會每以為恨幸一相見又事多艱滯如此信乎人事如意難得也然尚得靜話數日爾人至辱手教承宿來尊候萬福知話耳遂行嚮和惟多愛

又 同前

某啓近辱書喜獲平安到京甚慰傾企乍至都下人事必多仍審已謁告歸絳州何其速也不亦少勞乎

即日春暄竊惟氣體清適某自相別後令醫工脫去病齒遂免痛苦然至今尚未敢放口喫酒情悰索然但覺一歲衰如一歲爾集序已了祇候更了鐫刻一併納呈閑居難得人便附書比此書至京計已西去故令八齋轉附至絳故未反其他惟嚮暖保愛早還以副瞻思

與陳比部力 嘉祐治平間

承有家訃賢姊有事竊惟悲痛老年親戚間不免時有煩惱人生常理只如此時暑千萬節哀寬中無由奉慰來日令兒子至寺中也五妹且省煩惱時熱圖



安也某再拜作坊殿丞良親 廿七日

又嘉祐治平間

某啓承昨日寺中舉掛時熱惟希寬中又知喫食所傷更須慎護辱惠茶具甚精竒多荷多荷藏之他時為閑居之用爾今則少暇也五妹喜安極熱未敢相邀歸家好將息某再拜作坊國博之右 旬休日

又同前

某辱惠答簡承臟腑已安和甚慰惠茶籠所作極精至石屏大是竒物可珍可珍但不得中間一片則不成器千萬為早取之此物他處未嘗見石屏世故多

有未有若此簡易而工妙也稍涼見過閑話某再拜作坊虞部 六娘兩日患臟腑今却安也果子自此更不令喫幸荷幸荷

又同前

人至承惠簡喜酷暑中與貴眷各安數日大熱恰值謝官人事紛紛疲朽遂不克支若非昨夕一雨少解煩毒其將奈何頻勞問念多感多感某再拜 住娘近日頗肯忌口亦漸向安謝念及也

又嘉祐治平間

多日不相見天氣斗暖喜與五妹各安和惠簡問及



牙疼多感多感兩日稍可雖浮動醫者云取未得須  
候根脫取之省力恐知恐知驢肉多荷多荷某再拜  
作坊虞部良親 廿二日 兩日却較喫得此物

又同前

某啓承惠蘇家藥多荷多荷亦嘗用之此但治咽喉  
爾某所苦者齒牙熱痛兩日來漸較蓋稍節滋味等  
物遂可爾過承憂念五妹歸家安否後日祠事畢便  
歸當得相見人還專此為謝某再拜 只前時兩般  
藥自好方待久使也

又 熙寧元年

某啓久不得信方深企想送劉司理兵士至辱書承  
公外體候安和四郎以下諸幼各安甚慰但以亡妹  
忽已周祥舉家見書信至重增悲惱爾某此老幼幸  
亦如常久欲作書只為累表乞致政未允候見去住  
後發書奉報爾今又忽有青州之命已兩次辭免欲  
且乞守毫蓋去穎邇便於歸計也未知如何也知吾  
親每每多不安遠官中有此煩惱誠難為情更宜寬  
心求安為善也亡妹靈柩今冬先送歸晉最為上策  
嚮寒千萬保愛不宣某再拜知郡比部良親 九月八日

與馬著作 嘉祐中



牡丹記荔支譜久欲附呈以俟刻跋尾數十字以是  
稽遲不恠不恠病目固不能書然君謨不肯為他人  
書而獨為某書此朋友間自是一事不可不記故勉  
自書取笑取笑

又 治平四年

某啓近縣人還奉狀新歲布和善人君子自宜享福  
惟餘齡晚暮益以病衰相見未涯徒積傾嚮鄙抱區  
區前書粗布政餘加愛某手啓知縣著作足下十二  
月十九日 寄惠花燭白草多荷多荷葦豈非自種  
耶甚佳甚佳泉水未為爾必以冰凍賣致未得也

又 熙寧元年

某啓專人辱書并以泉水為賜豈勝珍荷兼審新春  
履味清安河夫之投尚煩神用然處置得宜公私俱  
濟則所利博矣亮不以為勞也某再乞壽旦夕必見  
可否未間難為期約也當續咨報尚寒慎愛不宣某  
手啓知縣著作足下十九日 李集已領泉味皆佳  
然大抵東州水甘直湏於鹹水地飲之然後為貴爾

又

某啓病悴之餘人事踈廢忽辱惠教方承臨蒞齊城  
經暑公餘清適誨諭稠重開發蒙鄙感愧感愧咫尺



未期會話欽渴欽渴某再拜 病日多書字不得不  
罪不罪

又 熙寧三年

准西支郡蕭條何敢奉屈然吾儕以道為樂亦應不  
以閑要為計某至穎且少盤桓俟如蔡即當發削若  
遂所乞衰拙之幸多矣塗次餘未及詳

又 同前

最後一削甚懇意謂可以免并遂蔡何幸如之其餘  
區區未可卒布但不一會見尤為恨爾保愛保愛

又

某啓官守相望咫尺未親言話惠書勤眷兼以嘉篇  
富麗之作老病無惊得以拭目頓增鄙思也欣感欣  
感高材尚滯一邑秋冷多愛某奉白著作足下

與顏直講

長道

某啓嚮傳例罷學職初聞可疑及辱書始駭果然又  
承有淮陽之命君子出處不違道而無媿則所居皆  
樂况淮陽近家之便乎亮不動浩然之氣也交年積  
雪極寒體况想佳計行李不久當東相去逾遠會見  
何時千萬加愛

又 治平四年



某啓嚮在京師會吾子來人事忽忽不能以從容接  
高論及至毫聞還直學館出處相失誠可悵仰近惟  
經寒體况清適其退守僻州甚為優幸而衰病侵凌  
心志昏耗諒難久竊榮寵也目疾為苦臨紙艱於執  
筆鄙懷莫罄新歲惟冀加愛

又熙寧元年

某啓董君來辱惠音竊承履况佳適感慰曷已學館  
誠岑寂然塵事不到足以專志經籍則其所得與其  
所樂豈不多哉某今春日疾愈甚東州民物可樂處  
多但自以衰病少悰爾董君到必為言也

又同前

某啓衰病人事多廢久不奉書遞中辱問承經寒體  
况清適學舍久淹然以道為樂必無倦也某兩目益  
昏難久勉強乞壽已再旦夕冀得請西歸近穎為便  
爾相見未涯鄙誠莫道

又熙寧二年

某以病昏廢學情禮亦多闕東州一任寄委勉強常  
憂曠敗請壽冀未退休間苟安於藏縮爾久不聞道  
義之益與諸賢者迹日漸踈但欽渴而已

又熙寧三年



某啓近辱書承春寒爲道外無恙甚慰企仰竊憶去秋將離青社曾一奉書未審得達否某衰病如昨幸得閑暇偷安但苦病目不能看書無以度日詩義未能精究第據所得聊且成書正恐眼目有妨不能卒業蓋前人如此者多也今果目視昏花若不草草了之幾成後悔所以未敢多示人者更欲與二三君講評其可否爾但未知相見何時也報筆特艱莫布萬一漸暖加啻

又熙寧四年

某啓近辱書承涉暑講道外康和甚慰蕪蒙以鳧繹

先一有生字集爲示某自少時嘗得傳誦數篇每恨不見全編不意茲時頓飢渴藏家著錄以傳後世榮感榮感某以經春老病在告近已復尋在毫之請方治裝以俟命區區未遑悉布惟毒熱加愛

又同前

某茲者得請歸老恩出萬幸惟所苦渴淋自春發作經此暑毒尤甚蓋以累年之疾勢不易平然自此安閑冀漸調養爾兩目昏甚艱於執卷顧難銷暑景又親朋之會邈不可期恐遂不聞道義默默寢爲庸人爾殘暑加愛



又同前

某啓近小史一作史許充行奉書方在道人自都來又

辱惠問豈勝感媿兼承秋暑爲况多佳某自蒙恩許

其告老榮幸感激之懇前書已粗布惟乍還望聞人

事少勞而舊苦目足之疾得秋增甚舊書編彙未經

一二君商榷今遂復田畝會見無期此爲恨爾餘粗

如宜幸不多恤嚮矜惟加愛

與梁直講

某啓衰病退藏自宜屏迹忽辱惠問雅眷不忘其爲感著未易遽陳兼喜春和氣體清裕董直講來自學

舍具道群居之詳今其還也亦備見郡齋之况燕譚之際諒可及之病目愈眊然艱於執筆惟以時加愛

與直講都官熙寧元年

某啓自離毫更聞奉問春氣尚寒體履清勝某昨辭

青不獲勉策病軀東來而東州土俗深厚歲豐盜訟

亦稀甚爲養拙之幸而獨苦衰朽老疾日增爾歸計

遷延更須年歲也學舍久淹匪朝必有美命未間玆

愛某再拜直講都官足下正月九日

與曾學士熙寧三年

某啓近因人還得附拙記荐枉書尺其爲愧荷可勝



道也兼審秋寒提按之暇動履清福某去蔡咫尺以病足為梗少留于此忽復踰月匪晚向官所壽蔡相望時得拜問旅寓中草率為謝

與王補之 熙寧三年

某啓近者行舟過界上特辱惠書喜承秋冷氣體安和以至郡道里差遙不敢曲邀車騎又失於上問全乏迎候豈勝愧恨某蒙恩得請郡僻事簡衰年疲病苟祿偷安甚為幸也欸見未涯以時自愛

與謝景初 皇祐元年

某拜啓久不作書蓋由無便即日為政外奉親萬福

某幸且安郡僻少事然漸老懶於為學惟喜睡爾足下為道方銳著述必多此急足回無惜為寄春寒保重

論徐嶠稱弟子帖

春首餘寒惟閣烈動止安隱弟子虛乏繆承榮寄蒙恩獎擢授以洛州一歲三遷自南徂北既近都邑忝竊弥深便即祗命未由頃謁瞻望山門但增悽斷戰懼之情慙惶失據願玆重不宣弟子徐嶠

和南

某啓承惠佳篇豈勝欽服昨日見頌遂當祇詣曾不



為言其如清宴佳賓難復多得若曰春秋為義當得  
徐嶠筆法何用於闍黎稱弟子自南朝起此弊事遂  
成風俗其如近日士人佞佛者少宜於此時力與革  
此弊事惟在賢者為之禮曰君子動而為世法然則  
舉措其可不慎哉金氏世以財雄南方今乃出佳子  
弟甚可愛也雄漢瀛霸保州粉紙誰謂不可書請試  
察試察之下尚隱陳布字漫減

與修史學士嘉祐年

某啓辱教開發蒙滯實寡陋者之幸也早來寧王憲  
以為更名與鄭王嗣直數人同須再出封國其它更

有易名者偶不從封爾就中此卷錯處多然捨此更  
無也某白

又

某啓前日承惠服屬圖寡陋蒙益何勝感愧欲見當  
年修真宗實錄人官職姓名差官及書成年月告與  
檢示不罪相煩八日某拜白晉叔學士

又

多日不奉見春暖康和中間承見惠臘雪散者或有  
更乞少許某再拜外題簡呈

右三篇見秀峯隱居法帖或云與呂夏卿呂字縉



叔嘗同修唐史晉字疑省文

與人

辱留郡兩日偶客多不及款話惟望慎疾自愛俗子  
多是非難防勉強接納小疾不足過疑却恐過當服  
藥致生疾耳二者愚慮恃眷舊敢然悚惕公議  
難過亨復匪遙他不足道也區區某又拜

右不知與何人

書簡卷第九

莫不為勞苦

苦一作否

萬幸


一作至幸

存枉書尺

一作至又枉以書

向官所

此上一有勉字





書簡卷第十

與十四弟

煥字

大明

皇祐二年

歐陽文忠公集一百五十三

某啓仕宦多故久不附書冬寒計與諸眷安和某爲  
太君年老多病未能一歸鄉里親拜墳墓祖墳更望  
與照管餘託鄭齋郎致意此外保愛不宣某書上十  
四弟秀才閏月六日

又皇祐五年

某罪逆深重不自死滅禍罰上延太君以去年三月  
十七日有事攀號寃叫五內分崩不孝深蒼天罪逆  
深蒼天見在潁州持服昨者鄭齋郎自鄉中來得十



四弟書知與骨肉奉親各安某為於潁州十墓所以未及歸得只候服闋南歸相見書言回陂樹倒但勿令人斫伐為幸諸大小墳域且望更與掛意照管年歲間某歸相見餘不多言今因嗣立人回奉此不具兄押書寄十四弟秀才四月七日 究墨宣筆表遠信

又同前

十四弟秀才前者嗣立人力回曾附書及筆墨等想得達邇來暑熱上下各安某今者扶護太君靈柩歸葬先遣嗣立歸凡有可幹事為嗣立少心力吾弟且

與同共勾當相見不遠秋熟好將息不次某書白十四弟七月十五日

又同前

十四弟昨自扶護南歸得相見庶事頗相牽率自別計安諸姪亦計無恙某初十日已至家一行如常但憂墳塋惟託勤為照管諸已面諭更不言也此外教諸姪為學各令謹慎為佳時寒好將攝因人頗附書來言墳頭子細是切不具兄某書送十四弟

又皇祐六年是歲三月改至和元年

十四弟別後計與諸眷各安自離吉水後未曾得來



書中間景歸曾有書必達八郎近寄信來回陂門垣  
及水道並已改了不知是否因書言及今因寒食遣  
人力去上墳望與至少卿墳頭一轉為地遠只附錢  
去與買香紙酒等澆奠小叔西街小大郎諸骨肉並  
與伸意前曾附書更不寫書也更附錢五伯文與回  
陂墳頭張旺取伊一領狀封來仍指揮伊修蓋墻垣  
看鎖門戶千萬千萬如有事書中細與言來春暄各  
好將息不次兄押書送十四弟

又至和二年

書寄十四弟秀才久別計安樂吳榮來得書回陂墳

所必與照管今因寒食令人力蕭及去上墳將錢伍  
伯省請與買酒食去澆奠回陂墳并與覲當垣墻門  
戶錢一索與看墳張旺仍指揮伊覲當樹木及取領  
狀一紙來春暖好將息不具兄押書白十四弟秀才

二月四日

外封題云

吉州小市三院巷

修唐書

公當

三

請

蹟

又嘉祐元年

人力來得書知骨肉並安深慰深慰為今春使契丹  
寒食不曾遣得人往墳所吾弟並與到諸墳深感深  
感備見乞洪州亦只為先墳也未得間恐吾弟因出



入且為照管兄押書送十四弟四月十五日

與十二姪

通理皇祐四年  
年任東州司理

自南方多事以來日夕憂汝得昨日遞中書知與新婦諸孫等各安守官無事頓解遠想吾此哀苦如常歐陽氏自江南歸明累世蒙朝廷官祿吾今又被榮顯致汝等並列官裳當思報効偶此多事如有差使盡心向前不得避事至於臨難死節亦是汝榮事但存心盡公神明亦自祐汝慎不可思避事也昨書中言欲買朱砂來吾不闕此物汝於官下宜守廉何得買官下物吾在官所除飲食物外不曾買一物汝可

安此為戒也已寒好將息不具吾書送通理十二郎

又

承示近文猗如此作得也但古詩中時復要一聯對屬尤見工夫并門當因書言去昔選人有陳奇者舉主十六人仁宗見其未嘗歷選調特旨不改官以戒馳騫者初官宜少安之

與十三姪

奉職皇祐五年

奉職自赴任不曾得書到官下想安樂汝孤寒曾受辛苦知道官職難得每事當思愛惜守廉守貧慎行刑保此寸祿而已十四郎今却令回此子自縣中來



見其衣裝單薄汝只親兄弟兩人今食祿庶事宜均  
給更且戒約勿令出入無事令學書識取些字從來  
失教訓是事不會男子如此何以養身今遣人去知  
府舍人處求太君墓誌若此人將得來即更不言若  
未得來即汝因事至府中面告言吾令汝請文字且  
與請取求的便附來春寒好將息不具吾押送十三  
奉職 正月十四日 十四郎此中與綿襖子兩領并  
裹纏錢三索省只十七八程可到恐伊別亂破錢也

與大寺丞

發治平四年

王澤與書未行間孫宗古來得汝書知與幼小各安

甚寬憂想惟真所傳神改了甚善梅都官者必已畫  
了所是韓孟惟真既言自有本便可畫也須是四燈  
頭面髻鬢一般大小方好看且傳語催伊早畫了才  
到毫便去取也押付發 宅圖且勿與看 梅須亦  
帶接籬不然帶楮冠子但取好畫隱士帽亦好

又同前

吾二十五日離穎二十八日一行平安至毫初二日  
上事臨離穎時累有書去約汝於途中發書令先至  
毫及至此兩日杳不得一字何故何故以此不無憂  
想不知爾來汝與諸幼各安樂否迎孫婆孫入夏來



長進否婆孫瘡痍較未不瘦否此吾日夕所念也今專遣急脚子去勾當將來山陵發引排祭一事汝宜用心速與問當早令回報蓋慮後時難辦也其餘事更三兩日黃清去別有書也此外夏熱汝與諸幼各好將息遞中頻發一書來不必須候專人也五月二十九日至毫後第一書押付發今令急脚子計會王昌及杜延禧問當進奏官及轉問北京定州進奏官前次仁宗山陵發引時北京定州排祭用何儀式其祭前排列明器人物等用多少數目祭食味數贈作錢馬數目並令一一問取今體例來今別具畫一

劄子汝速召王昌杜延禧令體問早令此急足回來要作準備如杜延禧短使即令王昌用心勾當不管悞事此急脚子回時買明黃羅一疋附來

又同前

初三日遣急脚子發到毫後第一書為問山陵致祭事書必已到此中兩日內却併得遞中來者兩書知汝與諸幼各安只是聞得婆孫患職府後甚煩惱蓋孩兒三好兩惡已多時且須用心調理及知道妳子亂喫物道不得但向道候到亳州你不得迎子何不與青黛丸喫此是汝小時服之得効者前時王澤



附去者豆蔻丸亦是汝輩患臟府時得効者可與婆  
孫喫醫人藥中用黃連甘草者與兒喫此中日夕惟  
是憂煩二孫過夏不易且喜汝今夏一成安樂然更  
須慎食生冷吾自蔡河舟中大熟食生冷不節所以  
到穎渴淋復作穎肉誠不及京師午從京師來誠不  
好及食之日久亦不覺酒則絕佳於舊日巨魚鮮羹  
蝦蟹極多皆他郡所無以至水泉蔬菜皆絕好諸物  
皆賤閑居之樂莫比若也吾此只為一歲計不候宅  
成只候買得材料便決去躬親蓋造必更精潔也此  
郡閑僻未去間足以頤養孃瘦及食少心頭氣滿與

其餘並如在京時汝可勿憂黃清李德今並遣回餘  
事當續附書此外夏熱汝曹各好將息稍無人便即  
於遞中附書千萬六月七日第二書付發押王昌  
令買明黃羅一疋白生羅二疋已指揮與也要知要  
知七郎得書知在京安樂且與頰照管山陵致  
祭紙錢贈作馳馬等此中可造惟是祭前排立人物  
此中做不得須令王昌及早商量定令人家依數做  
下準備使用不可悞事也 涪場近日如何般墮并  
出買如何也向後可照折欠此事常宜用心 王昌  
處米麥絹錢索足未今並在何處收附所云趙祐請



米又是何米後信子細說來出京時舊曆上未請物  
數令王昌錄一本來仍開說後來已請見今未請  
惟真處畫四本惣了便與附來一梨直講并彭州劉  
比部書並早與附達見吳省副再三伸意續有書也  
近日群議如何謝上表到後莫有云云否因的書中  
略說來不妨曾學士書汝去相看自送與

又同前

十八日王昌等到得汝書并寄來生日信物依數並  
領知汝與諸幼各安此中上下並如常汝可勿憂只  
是聞得迎孫患痢甚憂得王昌來時書中只言稍減

次日送黃清急脚回書中並不言增減以此不能無  
憂才得婆孫稍安又却大姐患痢料得煎迫可知醫  
人須着照管且頗與錢但於房錢內取及他事少錢  
使但於房錢內隨多少取使不須先來問也只是分  
明上曆記數與隨手印押夏陸二人或請一月米各  
與五石昨送香合來依常年例各與酒一瓶侯威亦  
與一瓶汝昨寄文字比舊甚進可惜中止已得塗轍  
可以力進也吾此公事絕少渴已減但瘦少力及耳  
聽漸重然未甚妨事皆可勿憂此後恐人便漸少但  
過十日無人便發書即於遞中附一信來此外夏熱



各好將息六月二十三日押付發 穎酒二瓶且可  
喫毫酒更不及團茶新舊三餅 紙請取一月九舅  
作捉箔場亦須照管 排祭事已指揮王昌也只是  
祭文不知用不用速與問如用時覓一箇本子寄來  
蓋全不知體面也更靈駕起時百官皆服初喪恐  
代拜要孝衣更早擘畫 韓維龍圖昨因何出辭穎  
求襄何故不得而得汝問冲卿便知書中報來待發  
書往汝略要知爾 謝上表到多時因何不傳若傳  
人言謂何及今諸事有何議論亦問冲卿便知子細  
報來此中如井底 焦秘校所論如何且頰與見彼

新自南來必載柴米來如無時速報來 曾學士處  
國史送來足也未或未足早取令足報來

又 熙寧四年

昨晚令此防送兵士將書去今早果是送汝兵士回  
得汝書知到穎安樂頓解千萬憂想自此三五日因  
人或縣遞頰附一信來也他事若漸有次緒亦言來  
謝大伯花園與漕口莊帳曾問當未花園目見如果  
可買亦緩為之莊難看勿憑說者切在子細也吾今  
日已在假餘事續書言去二月二十三日押 所云  
州官來則復謁思之未便如倅幕縣宰須一先謁常



禮不可闕也寫書了又思得此助役事方欲議行人  
戶驚搔見說穎亦如此旦夕得安撫文移陝西軍賊  
撲滅已多其餘些小潰散更俟續報若一成定撲則  
過聖節可陳乞爾恐知恐知二哥一向不得書憂損  
憂損吾却且視事蓋不請假亦自可下表在毫時如  
此也此中吳寺丞久不安似虛勞恐知恐知

又同前

近送配軍人行有書去必到尋而急足回得汝書知  
在穎安樂甚慰甚慰數日無書去為等姚都官行然  
家中上下安樂別無事可勿憂吾在告已十餘日二

哥自京有書來言自家求休退都下別無議論西事  
亦不如傳聞別無警急但一二相愛者恐時方惡人  
求退懼有不如意事爾若止如此苦無可卹三五日  
欲遂入削爾恐知恐知候入削了去報也常保屋必  
已下手也如前所說甚好只是郭天錫不可專委須  
目掛心韋保屋了汝且謀歸要去時却去此中近故  
也州官盡曾看否且與周旋續思穎詩何為却不刻  
石問得言來更數事別有畫一向熱好將息頻附書  
歸三月五日押付大哥 襄州酒二瓶不甚好但少  
勝穎爾少喫發風物酒亦少飲千萬千萬科場尚遠



勿甚勞也

又同前

初六日姚都官行令急足隨去附書并酒計昨日已到也前日揚嬰入州得汝書并信物等並足知汝在彼安樂甚慰此中內外並如常吾在假已十七八日表并劄子寫下數日遷延未發今日待發凌晨忽聞邊事警急又却未敢發然素計蹉跌身心躁撓無地自容蓋悔恨者去就之計不能自決若去秋在穎便陳乞安有今日之悔到蔡又直進疑至今是自家做得今欲歸欲何人然昨爲梨教授云云遂陷惑至此

初八日決已發表封遞角次又得梨書切怪在假仍戒勿輕發遂又遲疑信知是一冤家冤家邊事未有涯自家退計杳未有也汝書言待蓋草堂并庵此不急之務不是汝去時議定且只修房錢緊急因何又却及此吾此書到切更勿議蓋也那取人工物料錢物等候葺保屋修了更修取此房錢緊急處千萬千萬今此書只爲言此一事切聽切聽此外好將息頻附書歸三月十一日押付發謝家園子前書已言去莊帳子不要今却附去致莊之說且已候汝歸細議也有說有說



又同前

劉宗去後防送人回得汝書知汝在彼安樂甚慰只是知二十三日方卓立韋家屋子約須一月方了不知汝甚時歸得本望聖節前到家爾薰漸向熱宜且歸也此中上下並安可勿憂吾已出廳五六日本為西賊驚傳今得諸處關報皆云招捉潰散無多也吾之進退自此以後自決於心如事從容希恩禮悠悠之談相悞至此也劉宗去時書中事甚詳此更不多言文論并詩頗作甚好惟愈熱則工矣青州兩料職租不久來當盡送去修房錢也恐知云遣郭天錫日

望其來此外好將息三月廿五日押送大哥 二哥  
此中亦久不得書可恠可恠

又同前

前日兩步闕兵士防送行有書并掩子必到今日蔡州大風微雨斗寒思汝數日前盡將綿衣寄歸不知彼中陰晴與此同否憂汝驟寒都無綿衣吾與孃憂心不能安今立走急足送綿衣去急足到立便令回或汝歸時帶來亦得未歸先遣回亦得餘事前書已說也好將息四月九日押送大哥

又同前



近兩步闕押賣藥人去有書續又專遣急足送綿衣  
去有書計皆已到今日郭順來得汝書知在彼安樂  
甚解憂想此中老幼各安可勿過憂蔡人今歲絕不  
疾疫但寒暑不常昨初九日大風寒所以專令送綿  
衣去及問郭順乃云九日潁州大熱方解憂心郭順  
云修造有次第汝欲二十頭可歸然不知何故更令  
郭天錫先歸也累書去問汝歸日皆不言嫌甚恹然  
韋業了其餘小者可委劉宗大者必下手未得也此  
中亦自有事要汝歸面議此書到千萬且歸它事前  
書已詳餘好將息四月十二日晚押送大哥 二哥

十頭出京三五日到家恐知恐知

又同前

前日吳廷平來得汝書知安樂近郭天錫來後便遣  
兵士作子等去望人到汝便離潁至今已八九日並  
無息耗不免憂疑蓋潁蔡深夏不免人多不安故也  
此中內外甚安吾十九日已入却致任文字若近例  
一削便允則旦暮間便有命尤要汝歸故更遣急足  
去如人到尚未起來即速且歸韋業已了只是屋下  
生活可委劉宗其餘前書已言候汝歸商量也所是  
準備吾歸潁之計今更未暇汝但且歸此中旦夕專



望路中好將息四月廿六日午時押付發

與二寺丞

夾

熙寧三年

自聞汝失意便遣郭順去接汝次日又遞中附書去方憂悶次今日劉玉自京來得汝八日書稍知動靜若至穎見了大哥便先歸則今應已在路得失常事命有遲速汝必會得應不甚勞心却是旅中不如意漸熱難行故未免憂想若此書到尚在穎則且先歸為嫌切要見汝蓋憂汝煩惱也汝切寬心求安如過亳州只約黎曹二君南臺相見勿入城千萬千萬此外路中好將息此急脚子如路中逢見便帶取回一

路使喚二月二十六日押付二哥夾

書簡卷第十

與大寺丞第七帖

香未有也

有字


下

修取此房錢

是此字


右書簡十卷命題以各人所至之官故於稱謂不必相應雖並注歲月而先後間有差互既已誤列重於改易姑附注其下又不可知則闕之吉綿







三國志卷之百三  
廿四

本書簡有論文史問古事之類已移入外集第十  
六十七十八十九卷中







本書所有論文文間方字類已移入外集第十  
六十七卷八十九卷中



